

四庫全書

集部

欽定四庫全書

集部

整菴存稿卷十三
四

詳校官監察御史臣龔驥文

中書臣劉源溥覆勘

總校官庶吉士臣倉聖脉

校對官中書臣王鍾泰

謄錄監生臣張士琛

謄錄貢生臣趙希濬

欽定四庫全書

整菴存稿卷十三

明 羅欽順 撰

墓志銘

一十四首

中順大夫南京太常寺少卿劉公墓誌銘

正德九年夏南京太常寺少卿劉公以疾求致仕優詔
賜允既還里居以其年十月十二日卒于正寢享年六
十有三諸孤壽等將以某年某月某日葬公某里某山
之原乃奉翰林庶吉士尹君襄所述行狀走數千里來

拜余請銘余與公同官南京有年晚辱同事不可謂不知公也銘安得辭按狀公諱稱字務教別號拙菴系出漢長沙定王之後世家永新城北曾祖諱元傑贈工部右侍郎兼翰林院學士妣歐陽氏贈淑人祖諱髦鄉舉易魁隱居教授學者稱為石潭先生封翰林院編修贈官如曾祖妣楊氏贈淑人留氏封太淑人考諱定之累官禮部左侍郎兼翰林院學士入內閣典機務卒贈禮部尚書謚文安妣賀氏張氏贈封俱淑人公賀淑人所

生文安第三子也成化壬辰以任子授中書舍人滿九載陞大理寺副仍掌中書事又四年陞南京尚寶司丞丁張淑人憂去位服除陞尚寶卿又八年遭賊瑾盜權變亂任子成法或相先以賂得免公誼不肯遂罷歸歸逾年賊瑾誅死乃還公前官滿考遂有太常之擢授階中順大夫比其致仕僅亦踰年爾公祖父皆名重天下而公天資純樸守其家訓惟謹歷官四十餘年寅畏小心未嘗有過其家居每夙興輒詣祠堂焚香展拜已則

就省張淑人安否遇有疾必躬侍湯藥不離左右及其卒也執喪甚哀而禮亦稱之接人謙厚質直不為矯飾其言若不出口至論先朝典故古今人物出處則屑飛繩貫終日無倦公退常博覽載籍吟詩合律作字雖倉卒無一筆苟士夫之論皆以為能世其家云配廬陵胡氏封宜人內助有方閨門整肅子男四長壽國子生次福富尚女四嫁賀柄賀宋蕭應寵蕭湘孫男七女四凡狀所述與余所以知公者皆同余為之銘宜也銘曰

石潭之孫文安之子祖父高明難乎其似之惟有有
行有文家聲載延有馥其芬優游兩京位登四品逾六
首丘知幾則敏惟終之令于始彌光遺基有付亦曰肯
堂

南京戶科給事中劉君墓誌銘

君姓劉氏諱絃字景瞻吉之安福人漢長沙定王子安
成侯蒼之裔其先居湯村君高祖敦復始徙今葛洲再
世得忠愍公球以大節聞天下而族姓益顯及君為給

事中於南京戶科從子兵科給事中持美淮安知府持慶又同時起聲烈蓋其盛如此君既居言路與諸同官一心多所建明如論竇給事不宜深罪章實君具草尤有關係又往往獨言戶科事言皆溫厚而平正可據以行正德壬申六月忽被錦衣逮先時君以職事入朝道淮陰有巨璫驟至持慶方侍君語未暇省璫璫怒即騰章誣詆持慶并中君獄成持慶坐免君得白還任然已因暑致疾醫療久之竟不起癸酉正月二十一日也得

年纔三十有六人事之變固有屈有伸而長逝者已矣
嗚呼是豈獨劉氏之不幸哉君自幼開明遇先生長者
談名理及古豪傑事輒拱立注聽長益深造遂以春秋
擅名邑庠弘治甲子領鄉薦明年登進士授江陰知縣
時海寇擾鄰境猘甚民洶洶君至首料丁壯為備備甚
設卒保無虞堂左右立二厨分收案牒日以次發視決
遣而謹其局鑰定擬賦役覆視必再三由是吏絕姦欺
刑清政平民小大無不服者時詣學視諸生業且問興

革所宜一日諸生以修學請乃從容風曉俾歸各謀于父兄居無何相次以名來上計楹授任聿底完美少師石齋楊先生喜而記之逆瑾勢方張郡縣率以賄為悅苛政亟行君若罔聞知顧民間有隱田久逋輸稍稍摘取之以彌縫歲計而已前令涂禎既入臺忤逆瑾以死士民悲思不置君立主于名宦祠祀之或危其舉一不顧愛民惜費至輟堂食錢以益賑卹受獎勞取具公帑甚廉蓋為江陰四年而擢戶科又踰兩年而卒君性質

端重寡言笑喜揚人善人或道機穽事輒頻蹙不欲聞
祀先延賓務致豐潔其於自奉泊如也曾祖伯文以忠
愍貴贈禮部主事祖珪父釗以君貴贈南京戶科給事
中母王氏贈孺人配謝氏封孺人子男二禔授女二君
之卒也六科同官與吏部兩歐陽郎中實經理其喪事
司勲復為狀以禔來謁余銘將歸葬其邑之原嗚呼余
何忍銘君也俾來告曰以己未發引不得已勉為之銘
葬在某年某月某日銘曰

白而長身有蔚其文朝綰銅章治聲夕聞乃陟黃門當
幾必果靡遺弗拾靡獻非可追榮所自式被恩私焚黃
墓道指日為期病不及瓜沒有遺憾昭示方來美銘非
濫

南京刑部郎中周德孚墓誌銘

正德丁卯冬德孚以甲子舉人來南雍卒業余時方為
司業一見偉之進而與之言知其所蘊有過人者輒以
遠大相勵明年春德孚遂中二甲進士擢知邳州其為

政有條甚得民和俄劇賊劉六等跳梁四出德孚亟料
丁壯增埤浚隍具器械積芻粟為備一旦賊果驟至即
躬率士卒登城抗禦晝夜巡督不暫休衆感其誠益相
與用命賊連失利遂解去城卒完民小大驩呼曰周侯
實再生我相與立生祠祀之余時卧病淮陰淮人多為
余道其事莫不壯其節也士申冬德孚進南京刑部員
外郎蒞山東司其治獄善求情嚴而不刻長貳亟加獎
予同官有不合者嘗挾私誣奏以事久之事竟白時理

其事者頗持深文使德孚毫髮可疑當不但已余方佐南銓知之特詳丁丑秋余奉表入賀聖壽德孚以考績聯舟北行旦夕晤語益款戊寅陞郎中其冬丁繼母柴氏憂解官南歸踰年又哭其父以哀毀致疾醫藥罔效後其父之卒七閱月竟不起庚辰三月二十三日也余時移疾家居聞訃大驚為之嗟悼累日豈意德孚遂止此邪蓋得年四十有五而已德孚天性孝友母早卒事兩繼母皆無少違忤有弟三人出繼母李俱幼而失恃

柴繼至遇之殊少恩德孚恒惻于心撫視周至服食寢處以至從師受室百需一切以身任之父嘗貸重貲挾以出遊既乃垂橐而返即竭力以償所貸生事日窘養大父及父母未嘗有失節家庭之內讒譖或行諸弟往往被譴德孚輒起敬起孝婉辭柔色委曲開譬必致感悟而後已論者尤以為難平居端重有威言不妄發自奉約而豐于賓友待宗族鄉黨各當其分一飯之德終身不忘處官處家條理皆極精密其可稱者亦多矣惜

哉周世居泰和羅江里遠有端緒德孚字也諱尚化曾
祖諱崇高祖諱希茂皆不仕父諱廷從封南京刑部員
外郎母李氏贈宜人配同邑路邊蕭氏封宜人柔順貞
則男子三人循典循法循理理邑庠生男孫幾人德孚
貴而能貧其卒也至無以庇其妻子蓋久而不克葬諸
子經營累年始謀以嘉靖乙酉某月某日奉葬某里某
山之原豫來拜余請書其墓中之石余於德孚有不能
忘情者乃據平昔所知參以其友郭正學所述事狀為

之誌且銘之銘曰

有質如山有文如泉有政惟蠲企高鑽堅行義昭宣世
所稱賢而不永年嗚呼莫之為而為者天也

封承德郎禮部主事前建寧推官孫公墓誌銘

公諱序字尚禮姓孫氏其先濠梁人六世祖仁從高皇
帝起兵始家于滁其長子聚充有武功世官正千戶次
子慶是為公高祖慶生會會生和皆以善人長者稱和
生允恭卒官贛州教授教授生公公有子七人其第三子

存登進士第今為贛州知府比三世以文學顯於是孫氏蔚為滁之名宗教授公經術通明由鄉舉歷教嘉魚贛州兩學諸生多所成就如都御史李公田御史孔公儒尚書董公越其表表者公早承家學成化癸卯繼舉于鄉六上春官不第弘治辛酉始擢建寧府推官至官創作理刑廳日勤事事獄無小大務底於平而亦無久淹者建俗貫服毒草以死誣人公得其情率反坐其謀主俗以衰息有殺人而泯其迹者吏不能得至枉坐平

人當道檄公與温州郡官雜治之公默禱於神得異夢
焉旦閱諸囚有張烏眼者後其衆以伏公命前之曰殺
人者汝也其人惶駭具服出其殺人之具于河而枉者
遂白閩浙間相與驚異以為神白水洞盜起官軍往擊
之屬公督餉餉道多灘險苦難繼公令以苧布為囊囊
其米遇險輒負以之夷竟事平餉以無乏他如督逋賦
輯礦徒皆有成勞可紀然性素剛直時為守者所為多
不法公常顯諫陰諷異其能改乃竟為所中傷罷而歸

歸則益留心於教子動以義方不徒文藝存初仕為禮部儀制司主事三載考最獲封公以其官階所得命詞甚寵公每寓書京邸必勉其盡職且令兼習刑名曰此用世所須民命所關也晚得雙泉於醉翁亭西乃作亭泉上品其風物釐為八景因自號雙泉居士又營壽藏於城北之龍蟠岡名曰安樂窩時時攜客往遊登臨觴詠樂之不厭也存既領郡持吳白樓先生文歸以壽公賓筵無虛日已而從公游於窩上公飲酒甚歡因諭之

曰汝觀我我壽殊未艾也而有君命何可久泥於私翼
日遂親送之登舟而誨勵加切州舉鄉飲欲得公為大
賓以公前此屢辭乃具輿從踵門固請公時年已八十
至則進止拜興皆中節度邦人士益高仰之無何喪其
長子因感傷致疾醫療踰月竟不起嘉靖甲申七月十
七日也其生正統乙丑十一月二十九日原配李氏伊
府長史傑之女贈安人繼黎氏滁州衛指揮全之女封
安人七子者長孝益府典膳次孜義官次則知府存次

季次孟州學生次厚次孚女四人長適吳知府璋之子
鶴次天次適舉人李德霖次適郭奉祀之子原孝孜及
吳氏女李出孟厚及李氏女黎出存季及郭氏女少室
寶妣李出孚馬出孫男九宗之守之憲之密之寅之實
之賓之宜之官之女五長適鄒金餘在室曾孫男一世
美存聞計哀毀先以書來致其寮伍貳守佐所為狀道
其乞銘之意而匍匐隨之初余偕計道滁獲與公晤遂
辱交焉于今三十餘年矣存仕學兼優顯揚斯在顧自

以為子職多曠幸得銘以葬庶以少逭其罪慝云者余
讀其書聽其言悲其志而慨公之不作也銘其忍辭葬
以某年某月某日地則安樂窩是已銘曰

侃侃孫公亶惟自信有懾其嚴有祗其正彼哉何物我
嫉我仇豈無泉石畢我優游抱弗盡施施弘于子寵命
煌煌其來未已公歸奚適安樂之窩堅珉有刻終古不
磨

廣西太平府知府王公墓誌銘

知廣西太平府王公以職事入朝道經故鄉疾驟作留治數日竟不起正德二年十月八日也享年六十有三諸孤恭等卜以次年十一月己亥葬公雲亭鄉小溪茶頭山之原先期具公事狀拜余請銘余游公父子間不為非知公者顧德薄名類有言不信其何能永公之存用此固辭而其請益力曰葬先公而不得先生銘猶弗葬也恭兄弟何所逃罪茲大事也敢二三乎余感其意勤乃為執筆公諱倅字去矜姓王氏王氏自晉太傳導

始盛於江南其後有崇文者嘗刺吉州因家于吉至宋
戶部侍郎贄又徙居泰和故公世為泰和人國初有以
文學徵為諸王說書學者稱竹亭先生公之高祖也曾
祖字伯貞官至瓊州知府有惠政民祠之至今祖諱直
累官少傅兼太子太師吏部尚書贈太保謚文端父諱
稹好學篤行楊文貞公嘗說玉以與之以公貴封中書
舍人加贈南京後軍都督府經歷文端諸孫凡十數皆
名能守家法而公最良年二十四以文端遺恩授中書

舍人歷陞南京光祿署正後軍都督經歷凡三仕率九年勤慎周詳未嘗有過弘治甲子始擢知太平太平地接蠻荒法禁積弛強猫弱鼠習謂固然公至首鋤厲民者數家配盜鑄之魁一人戮妖師一人豪姦屏息羣情大慰乙丑歲歉以官粟貸民約令輸息十一民以不餒息既入併他所通融分儲府之三坊為廩者九乃定為義廩法將隨歉隨貸不復取息期於久行大新學宮增補弟子員時臨視其勤惰讀書令自小學始又取古冠

昏禮俾其講說推行游宦死太平者積數喪貧不能歸
皆為資遣之俾歸葬行旅入境死喪疾病處之各有條
其施設規模類非俗吏所及也公器局修整惇行孝弟
母宜人歐陽氏早世每言及輒泣然事伯兄能敬以和
聲色之娛絕于耳目博學多識兼工詞翰而不以自名
接人甚恭雖童幼必以為禮識時知變然不苟為同在
中書時鄉人李孜省以左道幸朝士多出入其門公迄
無一跡其遷光祿蓋當國者嫌公持論高語嘗侵已故

以抑公公不為悔也督府卒有獲罪於其母者法司當以大辟公察知無大故呼其母諭以天性之真母大感悟泣下詣法司自實獄竟罷復為母子如初母病且死囑其家人世世無忘王公德公仕中外垂四十年其忠厚之存隨事及人多矣而得行其志之日淺故於建事立功有遺力焉然考論其平生大節則世之知公者未有不以公為君子者也初娶楊氏文貞公孫女早卒贈宜人繼任氏長樂知縣衡之女封宜人五男子愈恭愚

思哲愈乙卯舉人恭邑庠生思辛酉舉人文行皆有稱
而愈先卒二女子大司成羅公之子鏗建德司訓劉先
生之子廷儒其壻也孫男二女四公訓諸子恒曰學以
言行為要謹言正行必始于家庭干祿非其先也嗚呼
公其有見哉銘曰

儀維德隅恭維德基道豈遠而文端我師望之顒顒即
之雍雍亶其疏通為邦有庸弗違者天世欽厥傳歸寧
斯阡於千萬年

成都府同知致仕李君墓誌銘

成都府同知李君致仕家居者七年年五十八正德丁丑五月十一日以疾卒余其同年進士也聞訃則走哭于其家弔其寡孤問其喪具而退既踰月其孤鸞等奉監察御史李君師文狀來請葬銘余不文念於君之葬也無能為助遂勉從其請君諱儀字公著別號虛息其先鎮江丹徒人曾祖福洪武初徙實京師始占上元籍祖惟善父元昭皆有隱德君自幼穎敏彊學善記弱冠

從故方伯吳秋堂受易為門下多士稱首弘治壬子以
應天學生領鄉薦明年會試中式廷對賜同進士出身
歷知江西之新昌山東之冠同知四川成都府中遭家
艱者再居官前後不能以十載而皆有名初至新昌值
寇賊羣行即躬練兵民為備民驚徙者皆招使復業聲
張實副卒能上下相保寘橫民盧希淵於法及其諸子
境內震服臨江王張二姓格鬪王殺張一子懼罪乃殺
丐者三人稱為已子以誣張累訊不得其情後乃屬君

君問死者皆有婦邪各以婦氏對徐檢視黃冊驗諸死者及婦名氏張具有之王一無有也於是刑王婦婦即吐實曰受顧來爾事乃白冠俗死者多從火化君求不食之地為漏澤園以與民葬埋俗由是變勸學禮士補助貧乏士民皆歸心焉其為同知嘗攝守重慶時劇賊某者率其黨蔽江而下人情洶洶君百方備禦江兩岸皆置疑兵旗幟鮮明金鼓之聲相屬盜相顧巨測竟潛遁天全六番二招討以茶利相讎殺往來道阻播州當

嗣宣慰者與其庶兄不相能日尋干戈駭動四隣監司
皆檄君廉問至則一引大義責之且婉為開導遂皆感
悟頓首謝不避願受約束還報監司皆迎勞以禮然君
素羸弱頻涉危險勞瘁甚病且作遂以致仕請堅請而
後得之家居清約無異寒士而綜理詳密雅好吟咏有
虛息稿若干卷藏于家配王氏子男四長鰲先卒次即
鰲次鱗習舉子業次魴女三長適王知州子儒次適倪
主事子霆次適張布政子志孫男二祖夢祖繩女二君

於義利能知所取舍既終母喪父又疾篤兄子求分異
即請悉以家產與之播州贈累千金見即辭去此皆有
足稱者葬以其年某月某日墓在某縣某里某山之原
銘曰

學優乃仕光于累試為柔為剛應變不常宜仕而止式
全其美居逸而勤以詒厥孫其存孔厚而嗇於壽沒也
不亡眎此銘章

李先生墓誌銘

先生姓李氏諱穆字元載吉之泰和人泰和自國初以來號稱多士其尤顯者文學勛業往往追配古人或乃顛躓於時負其才終不獲展而深培厚積以大放厥辭者亦多卓然有可稱述先生其一人也先生方幼學屬對已有奇語長而益務博覽性復強記迥出其輩流賦詩作文不拘一體宏肆簡嚴各極其趣裁剪之妙幾於自然於叙事尤長有條而不紊蓋平生所作名寄寄集者凡八十卷所修郡邑志處別為部又數百卷嗚呼可

謂富矣其才如此而其用弗究豈非其命哉先生年三十有四始以虎賁左衛軍餘中應天府鄉舉明年得官南樂訓導將滿者會其令以官地私媚貴人先生不義其舉發其事被逮至京竟坐兩罷後雖申辯得直第令以冠帶家居士大夫聞知交致書幣以講學著書為請由是蹤跡多在荆楚間因以寄寄為號所至或數月或一二年留滯久之而先生老矣既倦遊而返則與諸故舊為真率會閣老澄江公尤重之每見必酌酒賦詩奕

棋相笑謔以爲樂如是者又十餘年年八十有三正德戊辰八月八日以疾卒其始終之際如此先生爲人坦亮和厚事親孝待諸弟姪有恩凡授徒所得束修皆持歸以爲親養晚年喪母諸弟請具適有潤筆金數十即以授之介弟元平以翰檢遷官廣東過家病卒倉卒無以爲斂即斂以已所備棺於親戚交游禮意無不周洽一飯之德終身不忘必報之乃已而尤善施德於人在南樂有竺簿者嘗被誣爲言於所知得釋竺致五十金

爲壽先生曰吾所爲言義也奚以利爲竟不受嘗客武昌見民冬月渡金沙江多溺死者亟以啟事白于當道乃倡爲橋以濟後因爲浮橋爲利至今其教人有方多所成就如曲沃二耿攸縣二戚尤知名所作真行篆隸諸書學者亦爭藏去以爲法蓋其性行與其及人者又如此曾祖文佐祖克禮太保王文端公爲銘其墓父諱玉璧博學工吟咏有詩集若干卷藏于家母劉氏以元平貴贈父翰林檢討母孺人配蕭氏先卒子男四長仁

繁昌訓導次侑仕信侑信皆爲儒仕爲郡掾女二長適
上模曾扞次適雲南按察僉事曾顯孫男九長潮鄖陽
學生次鴻潛漠沔溫淙潔洲女四長適藍田蕭傑次適
濠下嚴綬餘在室曾孫男二曾音先生初葬其配于五
十六都佛獅印西南爲雙壠而虛其左疾亟遺言諸子
善自立且令葬無違卒踰年諸孤始得葬日於十有二
月某日侑先事來請銘先生欽順父執蓋嘗獲侍教焉
茲其敢辭不敏乃據先生所自書年譜及仁侑所補述

事狀叙次如右而爲之銘銘曰

齊景千駟伯夷首陽同歸于盡芳孰遠揚兒童所羨金
朱煌煌孰云不朽德業文章嗚呼先生才高志剛栖栖
一世抑又何傷遺文百卷其存者長

義官蕭公墓誌銘

公諱城字景卿別號退逸姓蕭氏其先自瀘源轉徙社
坪再遷今泰和城西之茆園凡若干世矣曾祖仲齡祖
貫之父元獻貫之爲溧水知縣有能名其世父伯齡以

進士卒官寧波同知伯兄薦之亦以進士知高要而卒
仲兄引之以子少司空彞貴封左通政蓋百十年間領
科名登仕版者相踵家門之盛鄉邑推之公生而資稟
端厚初就外傳日記數十百言長益深造大爲少司空
所器許甫弱冠遂喪其父俄又喪其伯父大父母垂老
諸弟多未成人而公私百務日滋出公於送死事生養
老慈幼應門幹蠱一切盡心力爲之且惓惓督諸弟子
學俾無忝厥世處宗鄙以和以度未嘗有疾言傲色見

先生長者爲禮必恭其交接之周雖童孺亦無所忽諸父仕既顯聲勢烜赫公當其時方精爲諸子擇師程督之嚴無間晨夕稍暇則課僮奴力耕稼外此無他慕者雅好賓客客至爲具必腆家有餘積徃徃推以及人弘治中嘗入粟助公家賑饑例錫冠帶公儀觀瑰瑋設施優裕既拜錫鄉人僉以克稱其服爲公榮之比及晚年顧諸子若孫職業之修皆可觀因以退逸自號其志亦可見矣正德己卯二月二十日以疾終于正寢距生正

統己巳六月四日享年七十有一配曾氏多內助子男
四序廩廉廣廩廣嘗例授淮府典膳孫男十一仁傑儼
仰侃修偕仲倫佺僅仁儼俱邑庠生女三其壻贛庠生
曾應鳳西原羅光鳳余次子邑庠生珙曾孫男五朝鳳
朝賓朝用朝魁朝宗女三諸孤卜以卒之年十月辛未
葬公雲亭鄉下視之原先期奉平樂貳守段先生所述
事狀來以墓銘見屬余於公伯子舊有斯文契晚獲與
其季連嫻因以知公之平生頃余還任南都公攜酒殺

追送十餘里盡懽而別其時方盛暑而公俯仰酬酢竟別無倦容且飲啗皆勝孰意其遽止此也然其始終之際如此可不謂之福人已乎是宜銘銘曰

世累簪纓於赫家聲舍醇以生昌辰是丁不競不寧識慮惟精以篤于成以永其盈曾不百齡大命俄傾地有留耕允穆鄉評蘭玉交榮身後之禎尚覩茲塋俾表崢

嶸

旌義冠帶介軒劉君墓誌銘

君諱述倫介軒其號姓劉氏嘗奉入粟例受冠帶之旌
先世本汴人宋之季有功甫者來永萬安因留家邑城
之西其後裔日蕃且多才傑入國朝尤盛仕而名位有
聞于天下者若故刑部尚書克平湖廣左布政使述憲
河南左布政使咸卓今南京都御史咸栗父子兄弟踵
相繼也隱而名號有稱于鄉邑者則君其一人焉君曾
祖正年祖德英父廣宣正年仕元爲瑞金丞與贈刑書
昭年公爲再從兄弟皆功甫之曾孫也君生五歲而孤

有兄述彞僅十歲母孺人鄒氏年甫三十守志不貳以撫二子其伯妣周亦早寡有子述傳相與同志同居後十餘年而述彞又卒家事日就衰落君夙夜圖惟自振罔敢懈督視耕作生殖貨財爲之皆有方積累久之益恢于舊貫乃與述傳協謀作堂以事二母堂成其伯父浦城教諭有臨以雙節名之廣東布政使周公鐸爲之記一時人士得於見聞者皆相與稱頌二母之志有成而二子者爲能無負也有司察知其實將奏請旌門之

典鄒孺人俄以疾卒例不得與獨周被旌君既早孤事孺人尤謹孺人性嚴急每婉曲承順務得其歡心及謀葬孺人既得善地因奉移其先君之柩來合其謹於送終又如此顧以旌典弗逮每一念及輒慊慊不自釋云君性剛直而厚於倫紀言動詳審取予分明族有公使錢籍在祠堂君計所儲未足以周於用請得而蓄息之比其入也倍焉族老長良喜命子弟勞之以禮君再三辭謝曰此分內事爾何勞爲衆益賢之房孫鑾卿嘗舉

家病疫死亡相枕親戚無敢入其門者君亟以鑾輿歸
祝家人善視之審其藥食而時時進之旬日疾良愈留
不即遣旦夕撫教與諸子均踰年乃聽其歸立門戶鄉
人有曾華山者典司縣庫嘗寓食君所食畢忘所挾官
錢而去君見而收之有頃號而來曰食客多矣將誰詰
身家之禍今至矣君迎謂之曰無患輟而泣吾以歸汝
出其原封授之華山驚喜泣拜曰公活我公活我遠近
傳聞益用高君之義曰斯其所以爲介乎平生與物無

爭非公事未嘗涉迹公府諸子皆教之學其季尤穎敏
則遣充邑庠生學行之端信於朋友君享年六十有七
正德丙子十二月初八日以疾終于正寢臨終精明不
亂諸子環侍囑以孝友勤儉無忝我又顧其季子若婦
言曰汝尚無子宜審爲圖言畢命取酒正坐三醺恬然
而逝配蕭氏出同邑南門舊族賢明善內助子男四斐
彥能宏宏余子壻也斐早卒女一適泰和庠生曾用孫
男四軫卿畿卿克卿亢卿女二君卒後數月宏以母命

來南京拜余請葬銘問其期知未卜也余因與論古禮及鄉俗之弊曰茲事何可緩汝歸與諸兄其速圖之銘吾宜爲審日月有期不汝誤也及是乃來告曰將以庚辰之歲某月某日葬先君於邑東田心里塘下山之原石已具敢請乃按宏自爲狀及求得其族譜詳考其世次爲之論著如右而銘之銘曰

遐思以恣恣式亨厥屯無曰亨只孝之篤義之遵慈弘于教以垂永世之仁其蕃其大其有弗洵

上舍生郭君廷祥合葬墓誌銘

君諱麟字廷祥別號介軒姓郭氏其先自吉水白沙徙
贛之烏溪十二傳至朝玉甫自烏溪徙信豐龍洲君高
祖也曾祖諱子恭祖諱彥英以輸粟被徵爲義民又徙
安遠之陽寨考諱紹經母堯氏君自幼穎敏選充信豐
邑庠生從明師受尚書長而學識益進提學試入優等
俾膳於廩人屢試秋闈不利貢禮部卒業南雍無何喟
然嘆曰吾親既不逮養吾何爲於此遂謝病歸家居二

十餘年介然自守邑大夫皆高其行每鄉飲恒以賓介處之名聞於少參俞公會舉雙橋之役訪以兵事所言多見采納維時陽寨亦多警乃移家信豐之水東聲實蔚充水東稱巨擘矣正德壬申十一月十一日以疾卒其生正統乙丑八月二十三日享年六十有八君天性孝友初遊邑庠去親舍稍遠晨夕自講堂退輒南望欷歔得一佳味即馳獻其親度未嘗不敢輒食二親沒居喪如禮遇諱日必齋宿將事以爲常兄弟七人其四異

出相與雍睦無間而事其伯兄惟謹待兄弟之子皆有恩有遭誣在理者罪且不測亟捐百金以營救之事卒解待親友情極款曲而言論侃侃不苟爲同尤喜獎掖後進持身嚴整衣履雖敝不甚垢飲酒至微醺即止厭俗尚奢靡一以儉約矯之教行閨門出入以度無敢求服美者食指雖衆每時其寒飢而溫飽之緇黃之流庭無一跡其租入歲贏萬斛里中貧乏賴之以濟者不可勝數所焚逋券前後以數百計人多德之有士人持

券投君求濟其父喪君盡然輒遺之數金而歸其券優遇庄客果不給即貸其租惰者必撻以示儆由是人人思奮多有成富家者矣配胡氏出安遠名族時濬翁之女孝敬溫柔宜于上下性勤甚杼柚無虛日凡事一惟君命而彌縫之力爲多以正統壬戌十月望日生卒正德甲戌二月既望享年七十有三子男一守謨女一適瓊州王太守從子巽孫男五鐸鑰鏐鈇鍛鐸鑰鈇俱安遠學廩膳生鏐鍛俱信豐附學生曾孫男五日昌日宣

日乾日贊日習女五守謨及王氏女鏐孫鍛孫皆後君
卒家仍多故君之葬是以緩也始君特奇愛諸孫教之
甚篤晚得余從弟欽藹以爲之師遂委心託之迄今二
十餘年余弟猶主于其塾而諸孫者學皆有成此可見
君詒謀之遠諸孫亦無負君之教矣嘉靖己丑鐸等始
得吉地於信豐安息里下堡寨前並營二壙向卜是冬
十二月乙酉奉柩歸藏前期因其師來請余銘君之賢
余聞之余弟稔矣乃按其鄉友瓊倅俞君淵所述事狀

參以所聞叙而銘之而不辭銘曰

學匪徒文惟行之端理優于家政弗以官婉茲內相婉
德無愆以明以昌人也非天紹聞嗣服諸孫則賢有衍
其流莫深匪泉寨前之阜厥壤燥堅雙壁偕藏我銘是
鐫

封淑人羅氏墓誌銘

故工部右侍郎栢菴張公之配封淑人羅氏年七十有
八以疾卒正德癸酉六月四日其子鎮將請命于朝合

葬公墓先期屬其再從兄宿遷司訓鑰為狀拜授使者
來南都徵余銘欽順早辱公知既乃通好於淑人德善
得於耳目者非一日矣惟不文是愧銘其敢辭張羅皆
泰和西郭故家門閥屹相望淑人爲薊州同知孟旭之
女夙閑姆教動止有常則年十八歸公時公父贈光祿
卿華軒先生母贈淑人吳氏俱在堂淑人承事惟謹吳
愛之愈於諸婦公自家居績學至取科第歷官兩京榮
名宦業爲世所仰警戒相成之益淑人寔多有之嘗從

公呂梁直歲凶飢民載道公悉力賑濟淑人則親烹糜于內日出以食旁近飢者累百千人其用心如此後公以內艱服闋起淑人即留主家政園田邸第歲有增加人謂公官久宜然而不知淑人自奉甚薄凡事可省即省於中外賢子弟待之尤厚間有失怙恃者鞠之長而授之室故莫不爲之盡心遇臧獲有恩而指使必當故莫不爲之盡力用能以其家大非偶然也及再從公京師每時節朝賀三宮有所賜予歸必具香案載拜而奉

藏之已而公以疾終諸子姪皆不在侍淑人治喪一如
禮既請得卹典又得葬銘於名公遂扶柩以歸葬焉年
益高治家益不倦出入以度內外斬斬比疾革遺言毋
以金帛殮我葬毋隨薄俗妄費其善教諸孫務底于成
言訖更衣正坐而逝子男二長鑄早卒無子其妻蕭氏
寡居十餘年而終以節稱次即鑄用公蔭補國子生久
當得官以淑人老不忍去左右其妻羅氏故國子祭酒
冰玉先生之女賢孝宜其家女一適象山知縣蕭異孫

男五循律衛術衍女二長歸余次子珣次許嫁王翥淑
人德容莊肅言簡而善盡事理尤知所取予陰德亦多
初被勅命封安人後進宜人以至今封又兩被誥命尊
榮康豫壽考令終其福可謂備矣是宜銘銘曰

從夫而貴豈曰無人勤家以大或匪思存彼昧弗思其
祥可考睠此賢明子孫是保惟勤惟儉惟德之光惟柔
惟順而動也剛恩命屢申號登三品在笥之珍亦有宮
錦生涯奄盡五福斯成載塵卹典合葬惟寧

太恭人李氏墓誌銘

太恭人李氏諱淑賢出蛟川儒家為安福令恭之子歸
鄞之楊為安福司訓贈刑部主事南里公之婦山東提
學憲副崧畦先生之妻今南京儀制郎中叔通之母先
以崧畦初仕最封安人後以叔通初仕遇國慶覃恩加
封太恭人正德壬申叔通因考績過家得躬捧命書展
讀成禮踰年以疾卒癸酉十一月十九日也享年七十
有七太恭人生而貞靜其父尤所鍾愛為審相攸一日

與司訓會學宮見菰畦大加稱賞遂字焉及期來歸時
祖舅靖菴壽官祖姑張方以勤儉治家禮法甚嚴其姑
封太安人陳實繼贈安人金金慧而賢陳頗重滯弗當
祖舅姑意太恭人委曲承事務求得其懽心凡縫紉污
浣飲食賓祀百需一以身任之動皆整辦陳由是得安
其所終陳之世執婦禮無怠嫻族莫不賢之菰畦雅志
功名太恭人內助有方不使家事分其心文學益大進
遂發解淞省魁禮闈累官至副外臺官業焯著諸子始

知學太恭人即嚴督之期必紹芳祖父由是叔通亦魁鄉舉第進士以至今官其處娣姒諸姑間和易寡言御羣下不嚴而肅平居由謹婦戒非至親無得見者崇尚儉素絕不信浮屠言執祖舅姑及姑喪皆盡哀及崧畦卒于官痛毀幾絕叔通適來省亟令扶柩以歸藩臬諸公以崧畦守官廉諭所屬哀得千金爲賻叔通義不受具以白太恭人太恭人曰兒言是也汝父固以清白遺汝兄弟吾何取於此邪竟辭之子男二人長叔達以輸

粟拜承事郎娶張氏福清丞張君之女次即叔通學行
爲士林所重娶張氏開令鏞之女女三人長適確山令
吳照次適士人金鏞次適郡庠生盧俸孫男三人充耘
充耔皆習舉子業充耕尚幼女一人適郡庠生王楷叔
通聞計將奔歸謀葬于其兄謂銘當首圖以余雅相知
厚乃手述事狀介其僚友夏惇夫劉士鳳來請誼有不
容辭者遂按狀序而銘之狀無一語及辭金然士夫習
傳其事菰畦雖沒而道益行於妻子其可不書書之豈

徒昭示其後人且將以愧夫世之貪冒無恥者太恭人之葬當合菰畦之兆在其邑桃源鄉白馬塘窆以明年

十月十七日銘曰

宣尼贊易坤以順承有齊士女不習而能輔成君子龍變雲蒸惟坤主利而以義勝義方之教亦既有徵休命申錫奚啻百朋其終也令惟德之恒堂封永合來拜繩繩

太安人劉氏墓志銘

太安人劉氏爲封南京刑部主事蕭君廷美之配郎中
世賢之母也正德庚午遇國慶覃恩勅封今號乙亥閏
四月十四日卒于南京官舍其生景泰癸酉正月二十
九日享年六十有三郎中將奉柩歸葬于鄉以其同官
周德孚所述行狀來拜余乞銘余家與蕭劉皆有連郎
中於余相往還尤密誼有不得辭云按狀安人諱錦娘
出吾邑西平士族祖諱某父諱某安人生長富家既歸
封君朝夕承事乃若素嘗艱苦者事舅姑惟謹遇有疾

湯藥必循用節度及其卒也佐封君治喪哀且慎鄉人以孝稱之初其舅筠軒翁尚義輕財晚年家無餘蓄封君遂客遊江淮以取給已而占籍桐城家事一付之安人安人悉力經紀公私酬應斟酌適宜殊不見窘束之態尤盡心教子延明師購書史具膏燭至脫簪珥以給其費而時時督勵之郎中學垂成乃遣就封君於桐城益加磋磨俄以庠生中應天鄉試第七連登進士第擢累今官士夫皆知其有父母之教也安人性勤儉慈恕

而明達初寒暑雨不廢女工郎中屢迎養官中衣食之奉隨時稍加安人輒不憚曰汝今守官清慎吾自樂矣安用勉強爲此乎訓諸婦多溫言而規範甚整臧獲有過亦誨諭從容調恤族婣惟力所及遇外侮能傳片言折之婚媾間有武斷鄉曲者歲時謁見皆拒而弗納其族父雲表一時之高士嘗稱諸里族以安人爲有女中男子之風云子男三長即郎中世賢文學治才士林推重次世瑞次世立女二長適萬安曾藻次幼在室世立

與在室女皆庶出也孫男三午介聿女七俱幼前卒三
日世瑞自桐城來省安人良喜御酒食談笑至夜明旦
郎中省問如平時乃入部俄報安人驟得風眩疾倉皇
馳歸聚醫滿堂皆束手無措凡三日而逝嗚呼其命也
夫葬以其年某月某日墓在某里某山之原銘曰

君子生生于千里外內事之修非賢曷賴賓禮先覺以
爲子師教成于內名乃外馳爰登甲科官資屢進祿養
恩封式鴻厥慶迪勤訓儉終始不渝承以守官清譽孔

都何德之豐而壽之嗇沒也不亡眎茲銘刻

太夫人孔氏墓志銘

太夫人孔氏系出闕里宣聖五十八世孫故湖廣左方伯安菴劉公之繼室也祖諱某父諱練伯闕里支派實繁惟練伯公一門姍姍爲盛其女之壻多名卿賢大夫而弘泰弘緒二衍聖公又皆其甥之所出大抵皆德選也劉世爲萬安宦族公父官至大司寇受知英廟有重名而公克世其業以顯方爲御史喪其配歐陽氏聞太夫

人之賢以禮聘焉既歸公執婦道惟謹後公遷副閩憲
擢長湖憲進左右方伯太夫人隨宦南北實多內助公
得以盡心所職宦業日熙姑康夫人耄壽家居閒從公
歸省朝夕上食恭甚康夫人卒贊公襄事無違禮待諸
子女恩意惟均所生二男子二女子公卒時俱未成立
既而婚嫁皆以時舉其生事爲之經理尤悉家亦裕如
貌莊性嚴人莫敢犯然施諸嫗族疏數隆殺必有恒儀
度泰然迥出儔類望而知其爲貴也初以公貴封孺人

後以子貴進封太夫人晚年處人更和而治生之勤終始如一忘其身之老云子男四長玉累官刑部左侍郎以議獄忤旨閑住次奎先卒次璧又次璜以貢需次銓曹女四歐陽宗之彭穰黎恩張玉其壻也孫男九思憲念懋愈愆恕憲忠憲以官生領鄉薦懋愈俱邑庠生曾孫男五俱幼侍郎本公季弟之子公初未有嗣以屬歐陽夫人子之其事太夫人有順無違居閒累年與諸弟日隆色養愉愉左右太夫人心志益樂壽益高體益康

蓋享年八十而卒嘉靖辛卯三月二十六日也其生景泰壬申十月十一日侍郎初葬公于其邑松陽之原奉歐陽夫人祔于左以是歲十一月初十日奉太夫人祔于右先期具事狀緘書授其子憲俾來謁銘欽順與侍郎相知深且有連誼有不容辭者謹次其事而系之銘曰

肅肅矜輦來自闕里從夫而貴復以其子體柔用剛式弘內理龍章載錫先昭厥美松陽之原墓木拱矣葬于

斯合其永寧只

整菴存稿卷十三

欽定四庫全書

整菴存稿卷十四

明 羅欽順 撰

行述 一首 墓銘 六首

先吏部府君行述

羅氏系出豫章初祖諱詢宋紹興間來主泰和簿因家
邑城東北即今缺城三傳至伯玉府君諱子圭舉嘉定
解試伯玉二子曰涇甫則族祖庶吉士仲深府君之高
祖也曰和甫生叔大號大觀始徙邑南鄉上模里之西

岡大觀生君質君質生元亨元亨是生先高祖諱以直
號直庭富而好禮鄉稱長者配郭氏繼劉氏先曾祖諱
寧字存謙邑學生芳洲陳先生高弟未試而卒配曾氏
先祖諱鐸景泰庚午鄉試中式授黥縣學訓導贈通議
大夫南京吏部右侍郎配王氏贈淑人生三子二女長
子即家君自幼穎敏有志操隨任黥庠潛心問學未嘗
出戶庭先祖嘗以陰山木風之暫遊即反丙子還鄉應
試三場畢即赴黥不幸先祖前數日得疾棄世遂奉先

祖母扶柩歸葬己卯舉于鄉明年會試禮部中乙榜急
於祿養拜青田學諭便歸為叔父受室畀以家政奉先
祖母挈季父少姑以行時年甫廿四毅然以師道自任
青田科目久之士亦鮮有志者乃擇可進者加勵之謹
條範公勸懲日坐堂上親為講授夜間至齋房稽其勤
惰且有茶果粥餌之餽士爭感奮文風一變陳陳王庭
相繼中選倡修廟學饌堂事見潘太守琴所作記己丑
秩滿辛卯擢安慶教授先祖母仍就養焉其為教一如

青田樞星門部于藥局力白于太守且率諸生撤去藥局以位樞星及移學門於樞星之右求羅一峰先生記之學宇顏敝輒割俸修葺視如家事不屑屑煩有司初解舍有妖頗著影響屹不為動久之遂熄庠生吳本清母喪廬墓縣不為申徑取諸生呈轉達當道得蒙旌表丁酉秋闈閩浙交聘往考閱試得人為盛若司寇林公待用春官鄭公仲璧輩凡若干人是年先祖母壽滿六袞事既竣還至中道遂迎以歸會姻族稱觴為樂庚子

秩滿諸生得雋者柯忠劉溥王鸞方向戴恩亦前此所未有也辛丑上吏部考居最力辭有司之選壬寅進南京國子學正尋聞先祖母訃奔歸治喪乙巳復前職戊申考績受勅進階登仕郎乙卯秩滿先時已有歸志因不肖欽順初入翰林先夫人勸往一視乃北上六月轉國子助教仍加俸一級冬聞先夫人訃遂上疏乞休時年僅六十己未受勅封翰林院編修文林郎庚午受誥進封中憲大夫通政使司左通政庚辰加封通議大夫

南京吏部右侍郎是冬感寒疾尋愈逾年患疽久之亦
瘳癸未四月偶痰氣壅滯至十九日巳時竟不起生正
統丁巳四月一日戌時享年八十有七家君為人孝友
勤儉嚴毅方正重義輕利壯老一心養先祖母二十餘
年曲致承順居喪葬祭盡禮痛先祖不逮養移其孝於
伯叔祖先後迎至官邸極愛敬焉兩叔兩姑婚嫁以時
先祖母視成而已撫教季父學成早世念之終身先業
惟叔父所取仍作棲以居之既倡羣從作本房廳事及

後堂增祭田以供時祀致政歸復作祠堂及聽事以尊
祖合族先塋所在一一悉心經理宗族嫻表待之咸有
恩意施不望其報有桀驁者率優容之終亦自愧服也
兩輯族譜家乘皆鉅梓以垂久遠服食器用雖貴無所
加然必整潔夙興夜寐罔自暇逸教兩庠升堂伐鼓恒
在府縣之先諸生每私計之九年無一日曠也以身為
教不尚言說一言之出聽者莫不敬而信之延及平民
亦恥為非禮安慶父老皆以為前所未見也既離任往

來經過諸生奔走候問如常咸依依不忍別有尾行數里瞻望弗及而後反者後復白于當道設主名宦祠生祀焉其遇諸生恩義兩盡於束修不計其有無貧者非惟不受某議婚不能成禮某室敝無以為居某親老而養不繼某親喪而不能舉且皆有以給之

畧見安慶志及李太守璉

書而鄉士夫之賢而貧者亦間周以義

見劉通府鉅書

然實無

厚積于時惟先祖母肉食而已敬以事上而不為諂非公事不入守令之門在安慶見太守止行揖禮而前後

守若陳侯雲鶚王侯璠潘侯蕃皆賢雅相禮遇會必坐
歛有文事輒以咨之巡按佀公鍾至舒見其立迎曰固
當驟試一論乃大加嘆賞曰吾巡舒六邑人皆稱汝行
檢可謂文與行稱矣佀明年巡浙遂有考試官之薦兩
任提學若憲副劉公鈺御史戴公珊婁公謙率優禮焉
戴每揚之於衆各縣學生有不率教者輒發詣講下背
書觀禮婁初至進武生十數人皆告願入府學婁問潘
守彼樂羅教授寬邪潘備稱之婁曰吾固知其然也在

南雍尤為大司成方石謝公所重謝歸休諸生謁文以贈謝得之喜曰吾初得先生之為人今又得此文惜不久處盡閱餘稿謝後起掌成均為作像贊有維昔南雍實為老成環視六館惟先生有聲之語一切世味泊然無所好惟酷好觀書然不喜泛濫六經通鑒綱目之外則文章正宗文選古體韓歐曾文李杜盛唐詩及本朝二三大集而已夙擅文名遇人有求無不樂應南雍務簡與同官為文會有所指摘皆自以為中其病也後

以不肖兄弟迎養又兩至南都及錢塘弔古探竒吟咏
尤富自丙辰謝事後或家居或就養三子實番侍焉而
季侍于家最久壽朝令旦必會嫺賓宴欸益無歲不樂
自作慶壽記紀其實以示後人每聞朝廷進一善人行
一善政輒不勝喜羣姦用事語及恒憾額長嘆季有召
命部符且再至即以大義速其行曰有以事君吾志樂
矣年踰大耋聰明康健金緋在躬人詫其榮而秉謙執
虛未嘗自滿雖後進晚生必與為禮人無遠近親疎皆

知其為君子長者而推為鄉之達尊未病前二月先祖神道碑亭初畢工即從子姪肩輿而往周覽畢喜動眉宇曰了吾此念節屆清明又欲躬奠祠堂不肖以筋力難強諫至再三乃已屬續前三日進茶猶欲自舉請曰甌熱則應曰我自知之執虛如執盈蓋臨終無一語之亂將斂則大風雷雨竟夕萬瓦如傾鄉人驚訝以為哲人云亡非細故也訃聞賜祭仍命有司營葬域事家君諱用俊字舜臣別號栗齋又號西岡退叟配先夫人同

里曾氏初贈孺人再贈恭人三贈淑人賢明慈孝與家
君相待如賓先二十九年卒家君終老不忘哀焉子男
三即不肖兄弟女二長適楊平次適蕭欽蕭氏妹亦先
卒孫男五琰珵珩璫珵璫俱邑庠生珩國子生女五
長適萬安庠生劉宏次適楊泰餘尚幼曾孫男四偁偁
儋份女一所著有芝田皖城南雍寓京歸田諸稿論語
有類編葬卜後二年乙酉正月庚申墓在邑樟橋里天
柱岡之陽先夫人同兆云

亡弟前都察院左副都御史允恕墓誌銘

允恕余季弟也諱欽忠初號敬軒更號西野晚樂金魚洲之勝作惺翁亭其上士友或以惺翁稱之生成化丙申三月十九日年二十預江西舉送遭母夫人喪未行弘治己未中禮部試列名第八廷試第二甲第三人賜進士出身三榜皆與仲兄允迪聯名庚申春授刑部福建司主事其秋遂移疾歸壬戌秋奉先吏部公赴杭以允迪在運司迎養故其冬還朝改禮部精膳司正德

丙寅陞署主客員外郎事明年春選陞通政使司右叅議三遷至左通政滿考推恩封先公如其官贈先母恭人壬申冬請告歸省癸酉陞南京太僕卿會疾作辭明年陞通政使行未及上而言者劾其曠職吏部得旨將改用之力引疾求退竟得請既而有司以病痊奏請起用不報嘉靖壬午始復除通政使添註管事辭不允會遭先公之喪及再被旨入朝供職則丁亥春也允恕舊有血疾變為積塊供職未幾疾屢作頗妨朝夕遂連奏

乞休上矜念之特改都察院左副都御史賜璽書仰總督南京糧儲視事僅浹旬復以通政使召辭疏亟上召命加嚴已丑春力疾啓行且再辭行至邳州奉冠帶間住之命抵家輒就牀褥疾日益甚更數醫竟不可為矣前卒數夕強起正襟危坐舉手向余首屬為銘已而從容百十言皆臣子大節且言事君之義敢有不盡但自覺光景已促無可奈何兄宜為我表白此心死無憾矣遂語及葬地顧諸姪歷示其向背曲折令善為之乃復

舉手向余曰夜向深兄宜就寢弟亦倦矣明當更盡所言然自後恐重傷余懷時有所付囑惟授諸子姪而已語皆精審如平日初允恕來告行余嘗酌之酒酒半頗慨叙其平生謂異日兄當銘我有志未就而卒此言幸勿忘也余笑曰安有是然心竊怪之及疾甚余偕允迪往省其宵輒感異夢或示余易義有戊與癸合之文卒之日則八月二十五日戊子也嗚呼孰非前定邪惜未徵其所自覺者何也享年五十有四吾羅氏初祖諱詢

當宋紹興間自豫章來主泰和簿遂留家邑城東北隅
今所稱缺城是也八世祖號大觀始徙居上模里之西
岡世遠族蕃居止頗隘允恕欲還居缺城未果乃市地
學宮之傍築室而居之高祖號直庭富而好禮鄉稱長
者曾祖諱寧從芳洲陳公受書游邑庠早卒祖諱鐸
縣訓導贈南京吏部右侍郎考諱用俊國子助教致仕
累封官與祖同祖妣王氏妣曾氏俱贈淑人配蕭氏封
恭人子一珏女四長許嫁曾教諭之子民章餘皆幼側

室丁氏王氏吳氏珏王出也允恕生質厚重自幼不凡
年十四五即有志向聞父兄前輩語及聖賢可學輒
踴躍思奮若不能自己者舉業外恒別有用心處家庭
相聚於學蓋無所不講若心性理氣諸說講之尤詳始
或異同終其所見皆合性剛負氣然於親賢取友每深
自謙抑惟善是從一時名士往往樂與之交晚於湛甘
泉尤善也為文工造語簡潔圓勁惟意所向善變而不
窮而必歸宿於理詩古近體多清婉有餘韻頗造古作

者畛域方將會萃其稿以俟知言者擇之事二親愉色
小心恒若不及奉養之具雖微未必躬視之余與允迪
性各有偏未嘗不婉致其樂也厚於宗族嘗別儲粟以
周其乏臨終慮其不繼復益之千石屬講求斂散法以
圖經久居官奉職綜理精敏尤善奏對廷中推為第一
嘗一充廷試讀卷官雖久從家食然於天下事皆嘗留
意逢時再出亦將有以自見矣顧阨於多病而年復不
永可勝惜哉以卒之年十二月甲申葬邑東門外金魚

洲上首寅趾申皆從其治命並營二竈虛其右以俟蕭
云嗚呼余衰鈍不文然所以銘吾弟者惟其信而已矣
文不文不計也嗚呼銘曰

生必有知孰為之制近止尋常遠通百世知之所逮皆
欲行之其近其遠抑有攸司進非子能實惟知退有赫
其臨有嚴其對斂其精英還之彼蒼隨帝周流其或不
亡

郭處士配羅孺人墓誌銘

孺人姓羅氏先祖考贈侍郎府君之季女也母王氏贈
淑人景泰乙亥十月二十六日孺人生于徽之黟庠官
舍故其諱曰徽娘踰年而府君卒後四年先考封侍郎
府君筮仕得青田教諭奉王淑人往就養孺人隨之成
化庚寅先封君滿考過家遂歸孺人于同鄉竹溪郭氏
為處士善仁君之配孺人性專靜寡言笑自幼奉母訓
惟謹及為婦能竭力以事舅姑烹飪調劑污澣補綴率
身親之不以付婢使姑老而患風痺左右扶護者十年

未嘗有惰容事後姑亦能得其歡悅處士雅克振奮孺人相之甚有方治女工常至夜分大布之衣非甚弊不易日積歲累貲用益饒用能廣園田新棟宇以成處士君之志春秋薦享賓客過從殷甘酒旨不戒而具尤篤于教子奉師之禮每每從厚待羣從子姪皆有恩有與處士不相能者遇事輒相持不置孺人恒委曲小心以彌縫其隙卒歸于和孺人體貌清癯然素少疾疾中年嘗苦目眩恪守禁忌俄而遂愈晚以勤家之故乃日就

衰憊一旦呼諸子語之曰死生有命吾度不能起汝兄弟其善事汝父務相與雍睦勤耕讀以圖光大家門吾死無憾矣翼日遂卒嘉靖癸未二月二十日也享年六十有九子男四長淳龍南縣學生屢試秋闈未遇次景直先卒次景文景賢女二長適平原曾僉憲嗣子紱次適上模曾國教諸孫庠孫男十三某某女二處士卜以是年十月庚申葬孺人于其里曾家山之原先期命淳具事狀來以墓銘見屬嗚呼自吾姑謝世而吾父同氣

之親無復存者矣永念平生友于之愛不知涕泗之交
集也未踰兩月吾父又棄諸孤積憂薰心百慮昏塞尚
安能執筆以銘孺人之墓邪葬事且嚴處士君竟不余
釋乃勉強叙而銘之銘曰

孝敬儉勤慈惠溫良宜家之本婦德之常彼驕彼哲慈
謂非祥不覩臬鳩疇辨鸞凰孺人逝矣遺馥彌芳亦有
賢子尚觀顯揚

亡妹蕭氏婦墓誌銘

亡妹諱考珠姓羅氏以成化己丑六月七日生於浙東
青田之官舍家君時為其邑教諭適九載當考績故因
以考名之稍長先母曾夫人親教之女事習之旬月輒
可觀其工多而用省者稍解即已性沈密寡言笑而遇
事優為先夫人每有所指使動皆如意以故尤奇愛之
年十五嫁為同邑蕭欽時肅妻時肅先君憲副公與家
君同領鄉書故因而締好吾妹出入貴富一以勤儉自
將相時肅治家斟酌淺深度量緩急不動聲氣而條理

斬斬時肅常曰吾家之成吾妻之力也憲副公嘗便道
還鄉良賤聚食累千指且賓客沓至吾妹介婦也適以
次當家隨分應酬未嘗有失恒痛先夫人早世於家君
動靜必謹候之屢獻時物以助甘旨既連失數子即以
時贊時肅置妾久之復無所出由是恒鬱鬱不自釋曰
如身後何余每從容寬譬之輒應曰諾然未出戶已聞
嘆息之聲竟以此成疾卒正德乙亥六月十五日年止
四十有七嗚呼痛哉後數月時肅書來以葬期告遂請

為銘夫其賢而不壽且無子余所為甚哀之者也將為之計久遠銘其忍無作乎吾妹有二女長適南富王煦次適清溪楊袞皆同邑葬以卒之年某月某日墓在千秋鄉江東里某山之原余往時嘗一至其處為時肅言可為陰宅者也銘曰

凡人之情皆願有子命之方正有無定矣妹也賢明獨蔽於此我銘其藏究極終始後千百年誰其忍毀

亡女劉氏婦墓誌銘

嘉靖甲申春余壻劉宏以女氏之疾來告亟令人往候之疾且進其二弟又迭往候之五月十六日竟不起年止三十有八嗚呼痛哉將以是年某月某日葬其邑某都田心之原宏來請銘銘蓋有不忍為顧不可無一言以慰吾女於地下乃追憶其平生誌而銘之吾女以成化丁未八月二十五日生名之曰任潔稍長其母攜之從余於官所即能領教戒嗜女紅間佐其母治庖饋已而業復在手居止有常處未嘗輒窺外戶於服飾不求

華美雖屢經修補亦自安之余心重其賢為之相攸屢
矣最後乃有薦宏者稱其秀穎好學受知其邑大夫黃
德裕特進補弟子員余察之信女時年十九遂以歸焉
劉世居萬安之橫街為衣纓鉅族吾女既習聞婦道承
上接下無所不致其謹舅姑悅之居五六年流賊破其
邑焚其居宏先已挈家避之江上適余復起莅南雍遂
以壻女偕行館之再期宏請還修子婦之職乃辭去吾
女初嫁資裝殊弗備及是亦未能有所增益察其意無

不悅者宏既抵家其父介菴君以口衆事煩析產授諸子宏方力學圖進取一切內事皆吾女任之自此比其卒十餘年間凡宏之親師取友所以資給之者既無或缺而田園加闢棟宇復完吾女之約身勤家於此亦可見矣生子皆不育有女二人長者年十三幼者六歲女之族姓曰泰和缺城羅氏今所居里曰西岡大父號粟齋國子助教致仕封南京吏部右侍郎大母曾氏贈淑人余其父也號整菴母曾氏亦贈淑人銘曰

女事之習其心孔專迨其有家黽勉相先勞則多有而不永年無忝所生銘以是鐫

恩例冠帶西磐曾公墓誌銘

嘉靖庚寅春正月外舅西磐公有疾欽順往問之就牀坐語甚款意氣淳淳如平日以酒饌進徧嘗之已乃握手言曰吾疾殆不起即不起宜以時葬勿效時俗所為第為我書其平生納諸壙中吾無憾矣余拱而對曰謹奉命旬日後公出就西齋宴息勢若小愈二月十六日

朝食罷覺微噎就卧少頃則恬然逝矣余走哭於牀遂
視棺斂時其伯子明揚官于廣乃與其仲明瑞謀殯公
于正寢之後堂以俟禮也明揚歸卜葬日得是年十二
月二十八日甲申欽順乃以公治命為誌公諱顥字之
恭別號西磐姓曾氏世居泰和上模里為望族曾祖諱
楚芳祖諱季倫父諱衝字士舉前母羅氏余從祖姑繼
母後塘羅氏母南舍郭氏以正統乙丑二月十三日生
時舉翁年幾五十矣得子晚頃刻不令去左右教愛甚

周公生質清臞或頗疑其難育惟西平胡處士仲溫甫一見竒之許妻以女後卒歸公是為外姑胡孺人也稍長從師讀書學五七言詩皆略解顧舉翁年已老乃一意服勞學以中輟性閭爽樂易事伯叔諸父與羣從兄弟處皆能得其歡心遇人無小大咸疏一見皆如舊識綜理家務及供事邑庭動皆整辦鄉人莫不嘆羨謂舉翁有賢子矣翁既逝公益挺挺自植族綱之振宣力尤多嘗慮房族間有不率教者特走會府以族兄刑侍公

故所立家範白於憲司願得舉行以保其族憲使陸公
大悅下其詞郡邑俾符公如所謂公益嚴諸身以為之
率進二三賢子弟以為之輔小懲大戒而恣肆者鮮矣
舉翁嘗率羣從建祠堂以事先公復與諸有力者增置
祭田時祭益備延師教子常厚為禮待賓客一無所忽
性不飲酒然公但在席即無不樂者有時興至或高歌
一曲音韻清遠聽者皆為之灑然余初入翰林公為挈
家以來留浹歲及佐南雍復走使奉迎至則為留再歲

兩京之勝皆徧覽之士夫多以詩文贈其歸往往能道其實嘗得別墅去所居之西僅里許竹樹深茂意甚樂之因以西磐自號又別治花塢出門百步而近名以藏春二晚年蓋無日不在塢中也邑大夫聞其賢嘗禮致鄉飲辭不赴及年八十遇覃恩詔下遂拜冠帶及絹綿米肉之賜賀客駢集酬酢雍容衆莫不榮其遭而美其稱也胡孺人先公二十八年卒所生女一人最長是為余室封孺人卒贈淑人子一人即明揚博羅河泊所官

貳室劉氏子一人即明瑞邑庠生孫男三人曰都曰鄒
曰郊曾孫男四人朝著朝彥朝譜朝瞻初公葬其考於
里中嶺背之原既老遂營壽藏於其側今啓而葬焉墓
門北向因其山勢然爾銘曰

惟西有磐碩人之寬貞于歲寒五福斯完葬從其先既
固永安匪辭昌傳堅珉是錯

處士楊君墓誌銘

君楊氏諱平字顯正別號勿齋余女兄之夫也年五十


有二正德己巳五月庚申以疾卒親交厚者皆赴哭盡哀而余哀之念之至於久而不能置蓋不獨以其親也自余獲從君游于今二十餘年矣雖狎見未嘗不相先以禮相匡相翼一出於誠心而驩然無間其不相見遇有事輒交通手畢君所貽或片紙數語莫不粲然成文家君嘗稱其簡當可喜其風儀秀整性軒豁善辭辨從容往復衮衮數千百言不可窮然余說或長亦未始不欣然服也先夫人大故余在朝二弟荒迷莫知所措殯

殮一出君手極其周慎家君致政里居君時時來省遇
生日必清晨攜酒殽至歲以為常不爽時刻余兄弟相
繼登仕辱君贊喜者數矣而未嘗少以非義見干蓋其
識明而氣豪審于大體而所向者恒近正然也嗚呼余
閱人亦多矣求如君者蓋少而况肺腑之親乎此余所
以不能忘情於君也君幼學記誦兼人年十六受室其
父方游邑校圖進取即舉家政授之君不得辭學因以
中廢然治家極有條理常以其間涉獵書史旁及陰陽

醫卜之說皆頗通其大義事父母善承順弟奉亦有才智事多與之謀內協宗親外交納名人賢士施張磊落聲價聳一時富有餘財然一錢不妄用即當用雖空橐無難色楊氏居泰和世久其源流有太師文貞公所作譜在自君六世祖始遷高隴其諸父又分居綿溪君曾祖彥實以輸粟被旌為義民祖敏恭別號不侮父光衍未仕而卒母歐陽氏初室蕭氏贛榆大尹時習之女繼室是為家君國子助教封翰林編修之女於余為兄側

室劉氏蕭氏諸室皆無子先已立弟子泰為嗣女三繼
室出者歸尹貫劉出歸陳儋蕭出許歸曾氏子綱初余
往省君疾君首以葬地託余為相得航溪里南木岡寨
下之原吉比疾甚余再往省則遂託余後事第姑應之
嗚呼豈謂遽成永訣邪君卒後十有一旬有一日其從
子穗即余所相地斂斃並甕二壙越七日戊午壙成奉
君之柩葬其左虛其右以俟君繼室余於是再往視定
且為銘刻石納壙中以寄余情以終君之託云銘曰

才足以達其志氣足以充其智年則不償其有而從子
為之嗣嗚呼奈何其永寧於是



整菴存稿卷十四

欽定四庫全書

集部

整菴存稿卷十五

十六

詳校監祭御史

臣龔駘文

中書臣劉源溥覆勘

總校官庶吉士

臣倉聖脉

校對官中書

臣王鍾泰

謄錄貢生

臣趙希濬

欽定四庫全書

整菴存稿卷十五

明 羅欽順 撰

祭文 三十首

祭澄江先生尹文和公文

嗚呼學之博矣或短於辭惟公通敏當代攸推文章事業兩得云稀經濟大略公復有之雄聲偉望清秩崇資遭逢憲廟尤被簡知孰工為間官屢外移卒登黃閣叅預政機王言以大國是以熙元良是保朝著是儀重明

繼照彼此一時奉身而退鄉有袞衣江山之勝可遊可
嬉著述之富愈出愈奇踰八望九一疾不支訃音上達
當宁齋咨諡從中錫葬則有司公乎奚憾不朽在茲顧
惟某等嘗辱提撕山頽梁壞何仰何依寓哀一奠有淚
漣漉澄江明月悠悠我思嗚呼哀哉

祭三江先生毛文簡公文

嘉靖更化朝多老成一其心力以迓休明公作春卿首
嚴邦禮既飭既周神人具喜心勞身病夢繞南雲里門

未入凶訃遽聞嗚呼哀哉學博而醇文清而婉德厚才
充識精慮遠賢科首選謙約自持居無妄動行必循資
甫陟桂坊孰甘余沮竟長詞林孰非吾與經筵陳說疊
疊其恭文場校閱濯濯其公乃佐銓曹遂聯八座多事
之秋有聲無過驅馳萬里捧日而升化成可待壽顧弗
增嗚呼哀哉議禮之難古今所病猶幸殘經頗存明證
品節有稽民志斯定公之忠勤於斯為盛懋官懋賞恩
則非私病妨朝謁位許暫辭錫之溫詔春浹肝脾預期

平復來覲勿遲公竟不來皇心孔盡官豈不高用其未
極易名孔令卹典載申光昭青史一代全人欽順無能
辱公同榜過賴公消善資公長星霜屢易乖隔恒多尺
書往復不廢琢磨爰及晚年幸同史事筆削方殷去留
復異從茲一別再見無期邈風承訃有涕漣漣頃值家
艱荒迷失度薄奠寫忱後時為負嗚呼哀哉

祭楓山先生章公文

嗚呼天高日朗公之襟懷地負海含公之問學德容之

溫潤則甘雨和風氣象之尊嚴則泰山喬嶽萃精誠於
月窟天根悟至理於鳶飛魚躍疊疊焉無時不勤休休
焉無日不樂此欽順之於公蓋未易極其形容而粗能
道其大略者也公之發身則聽歌鹿鳴省元甲榜吉士
蜚聲公之歷官則翰林編纂評刑僉臬司成六館然而
滿考之書恒少居閒之日甚長惟公論之交附肆屢騰
於薦章朝廷方急於用賢由司成三遷而正位宗伯公
尤篤於自信自南雍一退而終老故鄉此欽順之於公

蓋未易詳其本末而粗能道其行藏者也藻思雄文忠
言謹論折獄惟明誨人靡吝何王金許上邈程朱正傳
斯在之死弗渝其所未為付之猶子出入門牆矧多良
士謂公宜壽千百為期云何一旦失此人師欽順初涉
仕途公方高卧竟以非才忝為公佐夕灸晨薰膏枯起
惰巨海纖鱗欣然自賀研窮性命商略古今何遠何近
何淺何深奉違彌久懷仰無任屢憑過客貽我好音聞
訃南銓亟圖遣奠家問驚心弗果如願奄罹大故孤露

玃玃迄茲累歲徒抱微誠墓道春風青回宿草翼翼新
祠栢題蘭榛敬遣頑兒祇薦蘋藻短誄無文中忱是倒
嗚呼哀哉

祭大司徒吳公憲之文

嗚呼才不虛生名不苟得必有勲勞効于邦國承流宣
化激濁揚清兼資文武濟以忠貞四十年間如公有幾
君子所資小民所倚我皇勉勉方切圖終人惟求舊公
遽罹凶天實生公著名亦早胡不少延為傳為保嗚呼

哀哉皐皐訾訾其玷莫知靖共在位公則有之赫赫炎
災其燄可畏寵辱不驚公其無愧高冠初掛三徑已成
論文尊酒樂我良朋伴與優游疾綿壽祉曾是哲人七
旬而止嗚呼哀哉蓋棺論定好惡疇私銘幽揭顯不朽
在茲丹旌翩翩行就窀穸曷寫哀悰瓣香東帛交游之
痛邦國之悲昭明如在歆此一卮嗚呼哀哉

祭大司馬王陽明先生文

惟公才周萬務學本一心氣蓋古今量包湖海紹斯文

之墜緒躋斯世於平康豈惟衆所同期誠亦公之自任
遭逢昌運服在大僚屬時望之方隆胡仙遊之遽爾固
有光於建立曾未究夫經綸偉矣希文天章遼邈勞哉
諸葛渭曲淒涼愚也弟兄夙欽風義交游以世氣味攸
同官邸論文不在盈尊之酒歸途講學猶存隔歲之書
約信頓乖盡傷何已素幃伊邇薄奠斯陳有炯精靈鑒
此誠意嗚呼哀哉

祭都憲金公德潤文

嗚呼一第為階百年良遠何以克終其惟勉勉公由鄉
校起擢魏科郎曹精彩如鏡初磨乃職旬宣于川于廣
于贛縱金閨楚交響庾姦隱慝公鑒惟明深山長谷公
令惟行莫祥匪刑莫惠匪政凋瘵以蘇反側胥定通才
宏量勤力小心何燥何濕何淺何深玄髮欲斑外庸斯
訖旋軫留都式均勞佚乃佐邦政乃長憲臺不徐不亟
陰闔陽開有周其防無罅不補遭彼權奸莫予敢侮功
成身退壽考令終全人之目交口屬公訃徹九重載廕

卹典出綸如紳俾幽作顯靈輒將駕素服盈庭齋咨涕
洟豈獨親朋亦有辨香來自千里報德時知以後為恥
吾儕宿誠真此一觴斯文之好何日而忘嗚呼哀哉

祭都憲歐陽公子相文

惟公稟質瓊竒抱才卓犖行事近乎中庸處心一於誠
確鄉榜榮登甲科繼掇出宰花封春勺萬萼晉陟烏臺
秋高一鶚祗膺副憲之遷躬提列郡之學既樂育夫英
材亦兼療乎民瘼方面正員載光簡擢刑以時清政以

時擴尹京府而令聞沛然佐都臺而清風凜若宜享遐
齡永儋高爵胡一疾之偶霑竟彌留而不作氣之當盡
者既還付於山川用之未窮者終虛委於冥漠此上下
之情所以無不盡傷而吾人之淚於焉為之迸落也丹
旆悠揚長江空闊歸葬故山復為完樸某等好素敦於
同鄉禮宜薦乎清酌痛方甚而詞莫宣情有加而儀則
薄嗚呼哀哉

祭常少劉務教先生文

惟靈天資醇樸心地坦夷為石潭之孫而克繩其武為
文安之子而善為之箕中舍承恩光增東閣符臺進秩
名著南畿既兼工於詞翰亦克謹於操持遭權奸之亂
紀甘廢黜而不辭陰靈既廓舊物重縻爰被清卿之擢
厥惟顯相之宜俄嬰末疾乃宿名醫方屢更而藥罔效
疏朝上而舟夕移行金紼於清晝覩桑梓如平時小愈
之歡僅洽長終之慘遘罹訃音遠徹孰不興悲欽順分
聯伯仲韻協壘簾尚擬重遊之有日寧知再見之無期

遙陳薄奠以寫我思公乎如在庶克鑒茲嗚呼哀哉

祭太平知府王公文

嗚呼世祿之家鮮克由禮自古雖然豈無卓爾惟公先
世太守尚書公少而貴晚亦分符百有餘年有祿有位
公視如無溫恭靜退出言舉足循矩應規若無不可而
有不為三載遐邦令行禁止食之誨之大小咸喜庶幾
黃髮以究厥施天乎何意曾不憖遺歸葬茲山其寧惟
久生死交情炙雞絮酒嗚呼哀哉

祭封編修陳公文

嗚呼鄉有老成一鄉之望儀刑所存奈何凋喪公以子
貴惟德稱之出言不苟持行靡虧命服在躬聲華有煒
會訂耆英養隆甘旨高年盛福以引以增後生小子是
仰是承子秩再遷握章南院庶公一來式燕且衍安車
未動凶訃遽聞愁雲黯黯落葉紛紛凡在官曹孰非僚
友惻愴同情遙奠杯酒嗚呼哀哉

祭王宜學編修文

惟仁與義人道大端有生均稟去之實繁所貴吾儒真知允蹈為臣必忠為子必孝時雖多變我則有常不幸而死其道彌光君世高明資稟尤粹學匪詞章務求諸內一官翰苑再犯逆鱗甫離炎瘴竟殞其身新化方流天子明聖彼獨何人構茲禍阱是非榮辱苟快目前百世之下容有聖賢旅櫬來歸江山慘淡求仁得仁君亦奚憾斯文之好遠大之期嗚呼已矣曷寫余悲

祭蕭若愚憲副文

甲子之秋鄉升秀士我之識君茲惟其始出入兩京過
從二紀我之知君詞章政理間辱詩箋率單底裏我之
懷君室遠人邇權任方隆生涯遽已我之悼君胡能自
弭身後清名洋洋盈耳有永其聞克旋其里弔以疾妨
辭由誠累寓敬一觴靈其鑒只

祭告江湖之神文

大江之神鄱陽湖之神章江之神欽順不幸喪妻封孺
人曾氏又喪介婦張氏茲遣兒子珦扶送二柩由上新

河發舟歸于泰和以圖安葬江湖浩渺厥有攸司謹以
剛鬣柔毛果殽清酌用伸虔告神其保佑俾人情胥協
風波不驚登岸如期副此惓切則存沒皆受明賜謹告

祭舅氏鼎翁文

嗚呼吾母兄弟次長惟公孝友直諒古人之風公在初
年讀書幹蠱出取束修入奉慈母家口數十視猶一身
飲食衣服莫或不均亞卿

公族父也

有言汝家良睦彼富彼

豪視之有惡曾惟大族禮正吉凶須公裁酌以適于中

公於晚年頗厭紛擾後子前孫朝園暮沼龍坡春暖杖
屨出遊登高眺遠其樂油油老父家居門牆密邇時枉
過從談笑移晷吾母先逝幸公久存庶同老父頻對清
樽將謂昊天俯從斯願孰意今茲奪公壽算嗚呼哀哉
欽順無似早辱稱奇鄉科之捷耀以大旗逮佐南雍特
廬枉視目擊清貧口贊心喜雖無旨酒亦暫淹留平安
之報別後屢收頃乞侍親來歸故里見公康彊欣慰無
比茲逢新歲總服任躬拜公弗克公遽考終嗚呼哀哉

考公平生諒無可訾沒世有稱訂于君子衣衾既備棺斂孔時哀號悲泣莫匪親知龜吉辰良祔于先祖水繞山環有龍有虎公歸奚憾生者徒傷少停風馭歆此一觴嗚呼哀哉

祭叔父守菴府君文

嗚呼惟我叔父一紀而孤我父惟兄是挈是扶是率是模以成厥德是度是諏以修厥職先祖宦業吾父是承居家而理叔父之能惇本鄉方朝耕暮讀為所當為惟

日不足公私兼濟門戶以光肆其餘力亦善詞章隣闔
我平族謀我定克厭羣心亶惟忠信帝嘉我父早賜歸
田薦封四品式介高年鴈序載聯華髮相映子姓振振
莫不承令春風秋月菊樹蘭階從容杯酒和樂無涯大
耄之榮方為兄喜如何一疾竟頽不起嗚呼痛哉憂勤
惕厲靡間初終生平所獲有吉無凶名以德延謀以孫
遠壽考令終旁稽亦鮮顧惟鄉族重失老成咨嗟悼嘆
有識同聲嗚呼哀哉欽順越自成童粗知學習仰賴提

撕爰忝科級間從家食興滿竹林迺于官邸亦辱來臨
拜別嘉禾壬申之夏夢想音容纔如隔夜思倅長育報
乏絲毫遽承凶問惟有悲號斂莫效誠葬莫供役悠悠
蒼天此恨何極一觴之奠其敢怠寬哀纏毫素辭達為
難嗚呼痛哉

祭外舅西磐壽官文

中元追遠時俗所同思翁不見有惻其哀翁殯在堂神
遊何許祇奠一觴泣涕如雨嗚呼哀哉尚饗

又

惟公德重于鄉壽幾于耄子姓振振率遵彝教東塢藏
春西磬寄傲取樂能多其神不耗乘化飄然如夢斯覺
諸福實全幾人能到惟予小子好自髫年迂愚靡及愛
助惓惓迨茲退處頻侍芳筵餘歡未洽永訣何遄靈輶
既飭于彼新阡寓誠薄奠有淚如泉嗚呼哀哉尚饗

祭李弟允恕都憲文

嗚呼死生修短吾不復疑廢興得喪諒匪人為若吾弟

之善始令終其亦可以無憾矣吾又何為哭之不足而繼之以辭邪蓋英才之挺出恒千一以為期其陶冶於陰陽者既精醇之間值而玉成於君父者亦甘苦之兼滋歷歲年其既久殆左右之咸宜冀仰酬於大造必有補於當時撫流光而自惜希前哲以高馳曾此志之未就忍何心而弗悲嗚呼天人之際誠有未易言者矣古今之跡豈無歷覽而周知者乎所以淚滿英雄之襟蓋不獨孔明渭曲之師而已嗚呼痛哉甲申之吉爰契我

龜玄堂深穩允協成規君行靡顧我老安資舉觴為別
能不遲遲嗚呼哀哉尚饗

又小祥祭文

吾弟云亡余襟猶濕誰謂茲辰小祥奄及四方上下魂
氣何之百憂余感知乎不知賓鴈再來桂華仍吐子獨
何為一去終古情深骨肉矧曰奇才長編斷簡觸目興
哀物理固然如何則可歆此一觴庶其慰我嗚呼哀哉

祭劉氏女文

父子之愛天下所同而吾愛之所鍾乃若稍偏於汝者
數年不見念之無已忽聞遘疾心甚憂之然以汝孝敬
誠莊克修婦道宜為鬼神之所鑒佑冀必臻勿藥之喜
以遂歸寧之願也豈期日復日月復月纏綿半載竟至
此極遂成千古之長別邪天乎痛哉荼毒盈懷言莫能
盡特令汝弟往奠一觴汝其有知歆我至意嗚呼哀哉

劉氏女周年祭文

汝生在室凡十九年嬪于劉氏其數亦然命既弗長子

復短折宗姻之論徒惜其賢昔人有言吉凶不僭今既
無徵於汝又安所取信於天耶倏再逢於諱日驚歲月
之易遷貞姿懿質永閼重泉惟見外孫女二人婉孌於
吾前而已嗚呼痛哉酒以薦芳詞以達意一氣感通無
遠弗至尚饗

祭劉壻咸宏文

陰陽迭運五行交錯萬變不齊其機疇握求之弗獲惟
曰自然莫致而至命也何言子之秀明識于初冠甥館

得人良適我願往來二紀匪直情親論文講學所敬日
新行已端莊性尤耿介孝友之稱孚于內外徐驅遠到
衆所共期云胡中道修與世辭嗚呼哀哉疾之初萌微
覺中燥懼貽我憂諱弗以告徵於面貌始克知之百方
醫療則已後時三歲孤兒八旬老母永訣丁寧載甘載
苦手書囑我一札十行披讀未竟淚下浪浪嗚呼哀哉
玄室既營靈輜既飾視窆末由重我心惻平生所學觀
象玩辭死生修短亦復何疑送往撫行兩兄一體慰子

于冥庶其在此有殽維旅有酒盈觴靈兮不昧來格來
嘗嗚呼哀哉

祭告故嬪曾淑人文

茲者樞已登舟安置妥貼時維冬半江湖水平晝多北
風舟行良便兒子珮不離左右季弟復得告偕行早晚
之間家庭無異吾妻魂靈其無恐無懼安歸故鄉以就
窀穸一杯奠告尚克鑒知謹告

祭黔國公夫人樊氏文

惟靈柔姿懿質毓粹含貞姆前保後不肅而成親則帝
甥芳傳椒殿容德既閑蠶繅亦善明哉都尉式謹相攸
莫如黔樂豈必中州萬里于行上公是配蘋藻宵陳叅
殷夙退篤生主器光紹前聞月行幾望桃實向菁音樂
在房亦惟靜好曾是委佗而不偕老痛深骨肉有淚如
澠喪車還葬卹典宜膺牛首我我玉顏永闕奠此一觴
縉紳之誼嗚呼哀哉

祭楊淑人陳氏文

月湖先生
楊氏之配

惟靈德門鍾美姆教時申祇循內則以慎其身清吏之
支豐城之望爰得所歸其車百兩姑嫜允顯位號斯宗
孝隆于始禮奉其終肅肅良人聖賢是企克配無違柔
嘉而理欽于賓祀惠此宗姻執麻服澣居貴猶貧樛木
垂陰芝蘭滿室撫愛之勤一如已出豈云徒愛尤篤教
之乃其文行莫可瑕疵攜赴鄉科庶幾聯擢胡不少須
遽歸冥漠相夫之效錫命已蒙夙勤九膽未覩攀龍鳴
呼哀哉欽順等辱在同鄉猷聞德操儀鳳在瞻失鳳是

悼風帆南移寓奠一觴慰存悲逝詞短意長嗚呼哀哉
遷葬顯妣夫人告文

維嘉靖三年歲次甲申十二月辛卯朔越二十六日丙
辰孝子欽順等敢昭告于顯妣贈淑人曾氏之墓男等
卜以明年正月元日奉葬亡父封侍郎府君于四十一
都天柱岡之陽牛了塘之上惟吾顯妣禮當合葬謹卜
明日丁巳之吉夙啓玄堂虔奉遺魄俯就新棺至日與
亡父靈柩同行往即永安之地伏惟鑒知

謁族高祖樂志府君墓告文

維嘉靖六年歲次丁亥正月己卯朔越八日丙戌族孫
南京吏部尚書欽順敬謁族高祖考樂志府君高祖妣
王氏孺人合葬之墓再拜而言曰府君去世垂八十年
德積厥躬慶延于後子孫蕃盛咸篤孝思改厝從宜獲
茲吉壤山川盤互永永其安慨想明靈不忘佑啓詩書
科第尚克有承瞻仰塋封良深慰感特牲清酌惟以薦
誠謹告

祭告始遷西岡祖大觀府君請神主入新祠文
頃年改作祠堂幸底完美乃涓吉日用妥明靈位正厥
中禮從其舊質堂府君位下子孫神主序列于左章山
府君位下子孫神主序列于右謹以牲醴用伸虔告靈
其降鑒是止是綏祐我後人永永無斁

祭告三代考妣請神主入小宗祠堂文

頃作小宗祠堂幸底完美式遵國典以妥明靈茲奉顯
曾祖考妣神主入居右第一室顯祖考妣神主入居左

晚年復形諸夢時如有待事匪偶然今擬名前堂曰有
開中堂曰思永後堂曰拱北式昭夢卜之祥仍寓箴規
之意率遵遺訓罔敢自專謹以剛鬣柔毛清酌庶羞用
伸虔告英靈如在惠我無疆

整菴存稿卷十五